



URED ZA REVIZIJU INSTITUCIJA BIH
КАНЦЕЛАРИЈА ЗА РЕВИЗИЈУ ИНСТИТУЦИЈА БИХ
AUDIT OFFICE OF THE INSTITUTIONS OF BOSNIA AND HERZEGOVINA

www.revizija.gov.ba



IZVJEŠTAJ O OBAVLJENOJ FINANSIJSKOJ REVIZIJI

SUDA BOSNE I HERCEGOVINE

ZA 2022. GODINU

Sarajevo, juli 2023. godine



Sadržaj

I	MIŠLJENJE NEZAVISNOG REVIZORA.....	2
1.	MIŠLJENJE O FINANSIJSKIM IZVJEŠTAJIMA	2
2.	MIŠLJENJE O USKLAĐENOSTI.....	4
II	IZVJEŠTAJ O REVIZIJI.....	6
1.	PREDMET I CILJ REVIZIJE	6
2.	KRITERIJI KORIŠTENI U REVIZIJI	6
3.	OCJENA REALIZACIJE PREPORUKA IZ PRETHODNIH IZVJEŠTAJA	7
4.	ORGANIZACIJA I RUKOVOĐENJE	8
5.	PREPORUKE ZA 2022. GODINU (REZIME)	8
6.	SISTEM INTERNIH KONTROLA	9
7.	BUDŽET SUDA ZA 2022.GODINU	10
8.	FINANSIJSKI IZVJEŠTAJI	11
8.1.	Pregled rashoda i izdataka iz budžeta	11
8.1.1.	Bruto plaće.....	11
8.2.	Pregled prihoda i primitaka	12
8.3.	Bilans stanja	15
8.3.1.	Popis sredstava i obaveza	15
9.	JAVNE NABAVKE	16
10.	KOMENTARI NA NACRT IZVJEŠTAJA	16
PRILOZI	17

I MIŠLJENJE NEZAVISNOG REVIZORA

Mišljenje nezavisnog revizora se daje na osnovu provedene finansijske revizije koja obuhvata reviziju finansijskih izvještaja, i u vezi s istom, reviziju usklađenosti aktivnosti, finansijskih transakcija i informacija sa relevantnim zakonima i drugim propisima.

1. MIŠLJENJE O FINANSIJSKIM IZVJEŠTAJIMA

Mišljenje

Izvršili smo reviziju finansijskih izvještaja **Suda Bosne i Hercegovine (u daljem tekstu: Sud)** koji obuhvataju: bilans stanja na 31.12.2022. godine, pregled prihoda, primitaka i finansiranja po ekonomskim kategorijama, pregled rashoda i izdataka iz budžeta, po ekonomskim kategorijama, posebne podatke o plaćama i broju zaposlenih, pregled dinamike zapošljavanja, pregled stalnih sredstava u obliku stvari i prava, pregled kapitalnih ulaganja, pregled doznaka iz tekuće rezerve budžeta, za godinu koja završava na taj dan i analizu izvršenja budžeta – tekstualni dio, uključujući i rezime značajnih računovodstvenih politika.

Prema našem mišljenju, finansijski izvještaji Suda prikazuju istinito i fer, u svim materijalnim aspektima, finansijsko stanje imovine, obaveza i izvora sredstava na 31.12.2022. godine i izvršenje budžeta za godinu koja se završava na navedeni datum, u skladu sa prihvaćenim okvirom finansijskog izvještavanja.

Osnova za mišljenje

Reviziju smo obavili u skladu sa Zakonom o reviziji institucija Bosne i Hercegovine i Međunarodnim standardima vrhovnih revizijskih institucija (ISSAI)¹. Naše odgovornosti prema tim standardima su detaljnije opisane u odjeljku *Odgovornosti revizora za reviziju finansijskih izvještaja*.

Nezavisni smo od Suda u skladu sa etičkim zahtjevima koji su relevantni za našu reviziju i ispunili smo ostale etičke odgovornosti u skladu sa tim zahtjevima.

Vjerujemo da su revizioni dokazi koje smo pribavili dovoljni i odgovarajući da osiguraju osnovu za naše mišljenje.

Skretanje pažnje

Ne izražavajući rezervu na mišljenje o finansijskim izvještajima, skrećemo pažnju na sljedeće:

- *Nedostatke i slabosti vezane za evidenciju i naplatu potraživanja (tačka 8.2 izvještaja).*

¹ Međunarodni standardi vrhovnih revizionih institucija (ISSAI) dio su Okvira profesionalnih objava Međunarodne organizacije vrhovnih revizionih institucija – IFPP okvira (INTOSAI Framework of Professional Pronouncements), koji čine tri nivoa objava: INTOSAI principi (INTOSAI-P), međunarodni standardi vrhovnih revizionih institucija (ISSAI) i INTOSAI smjernice (GUID).

Odgovornosti rukovodstva za finansijske izvještaje

Rukovodstvo Suda je odgovorno za izradu i fer prezentaciju finansijskih izvještaja u skladu sa prihvaćenim okvirom finansijskog izvještavanja na nivou institucija Bosne i Hercegovine tj. Zakonom o finansiranju institucija BiH, Pravilnikom o finansijskom izvještavanju institucija BiH i Pravilnikom o računovodstvu sa računovodstvenim politikama i procedurama za korisnike budžeta institucija BiH. Ova odgovornost podrazumijeva i kreiranje, primjenu i održavanje internih kontrola koje su relevantne za pripremu i prezentaciju finansijskih izvještaja koji ne sadrže materijalno značajne pogrešne iskaze uslijed prijevare ili greške, odgovarajuća objelodanjivanja relevantnih informacija u napomenama uz finansijske izvještaje, kao i odabir i primjenu odgovarajućih računovodstvenih politika i računovodstvenih procjena, koje su razumne u datim okolnostima.

Odgovornosti revizora za reviziju finansijskih izvještaja

Naši ciljevi su steći razumno uvjerenje o tome da li su finansijski izvještaji kao cjelina sačinjeni bez značajnog pogrešnog prikazivanja uslijed prijevare ili greške i izdati izvještaj nezavisnog revizora koji uključuje naše mišljenje. Razumno uvjerenje je visok nivo uvjerenja, ali nije garancija da će revizija obavljena u skladu sa Međunarodnim standardima vrhovnih revizionih institucija uvijek otkriti značajno pogrešno prikazivanje kada ono postoji. Pogrešni prikazi mogu nastati uslijed prijevare ili greške i smatraju se značajnim ako se razumno može očekivati da, pojedinačno ili zbirno, utiču na ekonomske odluke korisnika donijete na osnovu tih finansijskih izvještaja.

Kao sastavni dio revizije u skladu sa Međunarodnim standardima vrhovnih revizionih institucija, stvaramo profesionalne procjene i održavamo profesionalni skepticizam tokom revizije. Mi također:

- prepoznamo i procjenjujemo rizike značajnog pogrešnog prikazivanja finansijskih izvještaja, zbog prijevare ili greške, oblikujemo i obavljamo revizijske postupke kao reakciju na te rizike i pribavljamo revizijske dokaze koji su dovoljni i primjereni da osiguraju osnovu za naše mišljenje. Rizik neotkrivanja značajnog pogrešnog prikazivanja nastalog uslijed prijevare je veći od rizika nastalog uslijed greške, jer prijevare može uključiti tajne sporazume, krivotvorenje, namjerno izostavljanje, pogrešno prikazivanje ili zaobilaženje internih kontrola.
- stičemo razumijevanje internih kontrola relevantnih za reviziju kako bismo oblikovali revizijske postupke koji su primjereni u datim okolnostima, ali ne i za svrhu izražavanja mišljenja o uspješnosti internih kontrola.
- ocjenjujemo primjerenost korištenih računovodstvenih politika i razumnost računovodstvenih procjena i povezanih objava koje je stvorilo rukovodstvo.
- ocjenjujemo cjelokupnu prezentaciju, strukturu i sadržaj finansijskih izvještaja, uključujući i objave, kao i da li finansijski izvještaji odražavaju transakcije i događaje na kojima su zasnovani na način kojim se postiže fer prezentacija.

S rukovodstvom komuniciramo u vezi sa, između ostalih pitanja, planiranim djelokrugom i vremenskim rasporedom revizije i važnim nalazima revizije, uključujući i one koji se odnose na značajne nedostatke u internim kontrolama koji su otkriveni tokom naše revizije.

2. MIŠLJENJE O USKLAĐENOSTI

Mišljenje

U vezi sa revizijom finansijskih izvještaja Suda za 2022. godinu, izvršili smo i reviziju usklađenosti aktivnosti, finansijskih transakcija i informacija sa relevantnim zakonima i drugim propisima.

Prema našem mišljenju, aktivnosti, finansijske transakcije i informacije Suda za 2022. godinu u skladu su, u svim materijalnim aspektima, sa zakonima i drugim propisima koji su definisani kao kriteriji za datu reviziju.

Osnova za mišljenje

Reviziju usklađenosti smo izvršili u skladu sa Zakonom o reviziji institucija Bosne i Hercegovine i ISSAI 4000 - Standard za reviziju usklađenosti. Naše odgovornosti prema tim standardima su detaljnije opisane u odjeljku *Odgovornosti revizora za reviziju usklađenosti*.

Nezavisni smo od Suda u skladu sa etičkim zahtjevima koji su relevantni za našu reviziju i ispunili smo ostale etičke odgovornosti u skladu sa tim zahtjevima.

Vjerujemo da su reviziono dokazi koje smo pribavili dovoljni i odgovarajući da osiguraju osnovu za naše mišljenje.

Odgovornosti rukovodstva za usklađenost

Pored odgovornosti za pripremu i fer prezentaciju finansijskih izvještaja, rukovodstvo Suda je također odgovorno da osigura da su aktivnosti, finansijske transakcije i informacije u skladu sa propisima kojima su regulisane i potvrđuje da je tokom fiskalne godine osiguralo namjensko, svrsishodno i zakonito korištenje raspoloživih sredstava za ostvarivanje utvrđenih ciljeva, te ekonomično, efikasno i efektivno funkcionisanje sistema finansijskog upravljanja i kontrole.

Odgovornosti revizora za reviziju usklađenosti

Pored odgovornosti da izrazimo mišljenje o finansijskim izvještajima, naša odgovornost podrazumijeva i izražavanje mišljenja o tome da li su aktivnosti, finansijske transakcije i informacije u svim materijalnim aspektima, u skladu sa zakonima i drugim propisima kojima su regulisane. Odgovornost revizora uključuje obavljanje procedura, kako bi pribavili reviziono dokaze o tome da li se sredstva koriste za odgovarajuće namjene i da li je poslovanje Suda, prema definisanim kriterijima, usklađeno sa relevantnim zakonima i drugim propisima. Procedure podrazumijevaju procjenu rizika od značajnih neusklađenosti sa zakonima i



propisima koji regulišu poslovanje subjekta revizije. Također, naša odgovornost podrazumijeva i ocjenu finansijskog upravljanja, funkcije interne revizije i sistema internih kontrola.

Sarajevo, 18.07.2023. godine

GENERALNI REVIZOR

Hrvoje Tvrtković, v.r.

**ZAMJENIK
GENERALNOG REVIZORA**

Nedžad Hajtić, v.r.

**ZAMJENICA
GENERALNOG REVIZORA**

Neda Močević, v.r.

II IZVJEŠTAJ O REVIZIJI

1. PREDMET I CILJ REVIZIJE

Predmet revizije su finansijski izvještaji Suda za 2022. godinu i usklađenost aktivnosti, finansijskih transakcija i informacija s relevantnim zakonima i drugim propisima.

Cilj je da se izrazi mišljenje o tome da li su finansijski izvještaji pouzdani i da li bilansi u potpunosti odražavaju rezultate poslovanja. Također cilj revizije je procijeniti primjenjuje li rukovodstvo institucije zakone i propise i da li koristi sredstva za odgovarajuće namjene te ocijeniti finansijsko upravljanje, sistem internih kontrola i funkciju interne revizije.

S obzirom na to da se revizija obavlja ispitivanjem na bazi uzorka i da postoje inherentna ograničenja u računovodstvenom sistemu i sistemu internih kontrola, pojedine materijalno značajne greške mogu ostati neotkrivene.

2. KRITERIJI KORIŠTENI U REVIZIJI

Ured za reviziju institucija Bosne i Hercegovine (u daljem tekstu: Ured za reviziju) izvršio je reviziju finansijskih izvještaja i, u vezi s istom, reviziju usklađenosti. Revizija finansijskih izvještaja i revizija usklađenosti podrazumijevaju proces objektivnog prikupljanja i procjenjivanja dokaza, kako bi se utvrdilo da li su predmeti revizije, tj. finansijski izvještaji, kao i aktivnosti, finansijske transakcije i informacije, usklađeni sa odgovarajućim kriterijima koji su sadržani u zakonima i drugim propisima. Kriteriji predstavljaju uporedne parametre koji se koriste kako bi se dala ocjena predmeta revizije.

Za obavljanje finansijske revizije korišteni su sljedeći kriteriji:

- Zakon o budžetu institucija BiH i međunarodnih obaveza BiH za 2022. godinu²
- Zakon o finansiranju institucija BiH
 - Pravilnik o računovodstvu sa računovodstvenim politikama i procedurama za korisnike budžeta institucija BiH
 - Pravilnik o finansijskom izvještavanju institucija BiH
 - Odluke o privremenom finansiranju institucija BiH za 2022. godinu
- Zakon o plaćama i naknadama u institucijama BiH i podzakonski akti
- Zakon o plaćama i drugim naknadama u sudskim i tužilačkim institucijama na nivou Bosne i Hercegovine.
- Zakon o porezu na dohodak i Zakon o doprinosima (FBiH i RS)
- Zakon o javnim nabavkama i podzakonski akti
- Zakon o državnoj službi u institucijama BiH i podzakonski akti
- Zakon o radu u institucijama BiH i podzakonski akti
- Zakon o upravi i podzakonski akti
- Zakon o reviziji institucija BiH
- Zakon o Sudu BiH

² Službeni glasnik BiH, broj: 42/22

3. OCJENA REALIZACIJE PREPORUKA IZ PRETHODNIH IZVJEŠTAJA

Ured za reviziju je u izvještaju o finansijskoj reviziji Suda za 2021. godinu, dao pozitivno mišljenje na finansijske izvještaje i pozitivno mišljenje na usklađenost sa zakonima i drugim propisima.

U Izvještaju su date preporuke u cilju otklanjanja uočenih nepravilnosti, nedostataka i slabosti. Preporuke iz prethodnog perioda čija je realizacija bila u toku nisu ponovljene, ali se njihova realizacija kontinuirano prati u narednom periodu.

Utvrđili smo da je Sud u 2022. godini od ukupno date dvije preporuke realizovao jednu preporuku, dok je za jednu preporuku realizacija u toku.

U narednoj tabeli (Tabela 1.) prikazan je pregled ocjene realizacije prethodno datih preporuka.

Tabela 1. Detaljan pregled ocjene realizacije prethodno datih preporuka

Br. prep.	Preporuke iz izvještaja za 2021. godinu	Ocjena realizacije u 2022. godini	Status
1.	Sud treba u zabilješkama uz finansijske izvještaje objelodaniti informaciju o vrsti i ročnoj strukturi potraživanja evidentiranih u pomoćnim evidencijama.	Sud je detaljnu informaciju o vrsti i ročnoj strukturi potraživanja evidentiranih u pomoćnim evidencijama objavio u tekstualnom dijelu godišnjeg izvještaja za 2022. godinu.	
2.	Potrebno je da Sud u saradnji sa Ministarstvom finansija i trezora BiH preduzme aktivnosti na iznalaženju odgovarajućeg modela za knjigovodstveno evidentiranje potraživanja iz pomoćnih evidencija u Glavnu knjigu	Sastanak sa predstavnicima Ministarstva finansija i trezora BiH je održan 14.12. 2022. godine, a dva dana kasnije Ministarstvo je dostavilo dopis Sudu da sudski sporovi i njihova vjerovatnoća naplate treba da budu predmet objave i detaljnih obrazloženja u tekstualnom dijelu godišnjeg izvještaja Suda te da isti ne predstavljaju potraživanja već potencijalne buduće budžetske prihode po osnovu kazni. Nakon toga Sud nije preduzimao daljne aktivnosti vezano za evidentiranje potraživanja u Glavnu knjigu.	

Za označavanje statusa preporuka u pogledu njihove realizacije korišteni su sljedeći simboli: realizovane preporuke, preporuke čija je realizacija u toku, nerealizovane preporuke, preporuke koje nisu mogle biti ocijenjene u revidiranom periodu.

4. ORGANIZACIJA I RUKOVOĐENJE

Sud je osnovan da bi se osiguralo efikasno ostvarivanje nadležnosti države Bosne i Hercegovine, poštivanje ljudskih prava i vladavine zakona na njenoj teritoriji. Visoki predstavnik je 12. novembra 2000. godine proglasio Zakon o Sudu Bosne i Hercegovine, a Parlament Bosne i Hercegovine ga je usvojio 3. jula 2002. godine. Sjedište suda je u Sarajevu.

Unutrašnja organizacija i način rada Suda utvrđeni su Pravilnikom o organizacionoj strukturi Zajedničkog sekretarijata i Ureda registrara Odjela I i Odjela II Suda iz 2021. godine te Pravilnikom o izmjenama Pravilnika o organizacionoj strukturi Zajedničkog sekretarijata i Ureda registrara Odjela I i Odjela II Suda iz 2022. godine. Pravilnikom o organizacionoj strukturi Zajedničkog sekretarijata i Ureda registrara Odjela I i Odjela II Suda uređena je organizacija, djelokrug rada, način rukovođenja Sudom te opis radnih mjesta državnih službenika i zaposlenika. Pravilnikom su sistematizovana radna mjesta za 301 izvršioca, 10 volontera i 58 sudaca.

Prema važećem Pravilniku, poslovi i zadaci iz nadležnosti Suda obavljaju se u okviru sljedećih organizacijskih jedinica: Odjeljenja Suda (Krivično, Upravno i Apelaciono), Ureda registrara za Odjel I i Odjel II, Zajedničkog sekretarijata Suda i Jedinice interne revizije.

Sudom rukovodi predsjednik Suda koji je 27.01.2023. godine imenovan po drugi put na mandatni period od šest godina.

5. PREPORUKE ZA 2022. GODINU (REZIME)

Izveštajem o obavljenoj reviziji za 2022. godinu obuhvaćeno je pet preporuka. Od navedenog broja, dvije preporuke se odnose na reviziju finansijskih izvještaja, dok su dvije preporuka date zbog utvrđenih neusklađenosti aktivnosti, finansijskih transakcija i informacija s relevantnim zakonima i drugim propisima. Jedna preporuka se odnosi i na finansijske izvještaje i na usklađenost.

U tabeli koja slijedi (Tabela 2.) prikazani su podaci o datim preporukama za 2022. godinu (segment revizije, predmet revizije i status), a preporuke su detaljno prezentirane po procesima u izvještaju.

Tabela 2. Preporuke za 2022. godinu

Br. prep.	Tačka izvještaja	Revidirani proces (naslov)	Predmet revizije		Status preporuke ³	
			Finansijski izvještaji	Usklađenost	Nova preporuka	Ponovljena preporuka
1.	8.1.1.	Bruto plaće		●	●	
2.	8.2.	Pregled prihoda i primitaka	●		●	
3.	8.2.	Pregled prihoda i primitaka	●		●	
4.	8.3.1.	Popis sredstava i obaveza	●	●	●	
5.	9.	Javne nabavke		●	●	

³ Status podrazumijeva novu ili ponovljenu preporuku.

6. SISTEM INTERNIH KONTROLA

Sud je odgovoran za kreiranje, primjenu i održavanje internih kontrola koje su relevantne za pripremu i prezentaciju finansijskih izvještaja i usklađenost poslovanja sa zakonima i drugim propisima.

Finansijsko upravljanje i kontrola

Sud je sačinio osnovne dokumente potrebne za uspostavu sistema finansijskog upravljanja i kontrole, postupajući u skladu sa Zakonom o finansiranju institucija BiH⁴, Priručnikom za finansijsko upravljanje i kontrolu i Smjernicama za provođenje procesa upravljanja rizicima u institucijama BiH. Sačinjen je popis i izvršeno mapiranje poslovnih procesa, utvrđeni i procijenjeni rizici te izrađen registar rizika. Uspostavljen je sistem izvještavanja rukovodstva o provedenim aktivnostima u vezi uspostave i razvoja sistema finansijskog upravljanja i kontrole.

U 2022. godini imenovana je Radna grupa za razvoj sistema finansijskog upravljanja i kontrole u Sudu BiH koja je sačinila Operativni akcioni plan za razvoj sistema internih finansijskih kontrola u Sudu BiH za 2022. godinu. Fokus radne grupe bio je usmjeren na ažuriranje mape poslovnih procesa i registra rizika i unos istih u PIFC aplikaciju kao i kontinuirano praćenje i procjena finansijskog upravljanja i kontrole u Sudu.

U skladu s tim identifikovani su novi rizici i poslovni procesi te mjere za ublažavanje i smanjenje navedenih rizika. Pored postojećih operativnih i finansijskih rizika koji se vežu za poslovne procese, radna grupa je identifikovala i rizike koji se odnose na ostvarenje postavljenih ciljeva iz srednjoročnog plana rada, u skladu sa Smjernicama za upravljanje rizicima u institucijama Bosne i Hercegovine – Verzija 2.

Sud je također identifikovao i rizike vezane za uvezivanje potraživanja i evidentiranih uplata sa konkretnim predmetima kao i uspostavljanje pouzdanih evidencija potraživanja, ali kontrolne aktivnosti iako su u formalnom smislu uspostavljene, još uvijek ne funkcionišu u potpunosti, što je detaljno obrazloženo u pregledu prihoda i primitaka.

Godišnji izvještaj o finansijskom upravljanju i kontroli za 2022. godinu je sačinjen i dostavljen Centralnoj harmonizacijskoj jedinici Ministarstva finansija i trezora Bosne i Hercegovine.

Interna revizija

U skladu sa Zakonom o internoj reviziji institucija BiH⁵ i Odlukom o kriterijima za uspostavljanje jedinica interne revizije u institucijama BiH⁶, Jedinica interne revizije Suda nadležna je za obavljanje interne revizije u Sudu i Tužilaštvu BiH. Jedinica je uspostavljena u 2021. godini. Potpisane su Povelja interne revizije između rukovodioca Jedinice i rukovodioca Suda te Povelja i Sporazum između rukovodioca Jedinice i rukovodstva Tužilaštva BiH o vršenju interne revizije u Tužilaštvu BiH. Jedinica je donijela strateški plan 17.12.2021. godine za period 2022-

⁴ Službeni glasnik BiH, broj 61/04, 49/09, 42/12, 87/12 i 32/13

⁵ Službeni glasnik BiH, broj 27/08 i 32/12

⁶ Službeni glasnik BiH, broj 59/19

2024. godinu te godišnji plan za 2022. godinu 30.12.2021. godine. U tekućoj godini planirana je i realizirana interna revizija obračuna i isplate plaća u Sudu, revizija procesa službenih putovanja te naknadna revizija službenih vozila i naknadna revizija obračuna i isplate plaća.

Cilj revizije obračuna i isplate plaća bio je procjena adekvatnosti i efikasnosti sistema internih kontrola i funkcionisanju istih pri obračunu, isplati i evidentiranju plaća. Navedenom revizijom nije obuhvaćen način obračuna naknade za vrijeme privremene spriječenosti za rad (bolovanje) za zaposlene u Sudu, a navedena problematika je obrazložena u tački 8.1.1. izvještaja.

Jedinica je također u skladu sa godišnjim planom obavila reviziju korištenja i održavanja službenih vozila i reviziju obračuna i isplate plaća u Tužilaštvu kao i naknadnu reviziju korištenja i održavanja službenih vozila u Tužilaštvu.

7. BUDŽET SUDA ZA 2022.GODINU

Zakonom o budžetu institucija Bosne i Hercegovine i međunarodnih obaveza Bosne i Hercegovine za 2022. godinu⁷, Sudu su odobrena sredstva u ukupnom iznosu od 19.203.000 KM (tekući izdaci 18.943.000 KM i kapitalni izdaci 260.000 KM). Budžetom je odobreno 288 zaposlenih, a na 31.12. u Sudu su bile zaposlene 284 osobe i to 269 u okviru redovnog budžeta i 15 zaposlenih na IPA projektu. Prosječan broj zaposlenih u 2022. godini za koje su isplaćene bruto plaće u Sudu bio je 286.

Sud je svoje aktivnosti do usvajanja budžeta za 2022. godinu finansirao na osnovu odluka o privremenom finansiranju za prva dva tromjesečja.

Tokom godine izvršeno je usklađivanje budžeta koje se odnosi na odobrena sredstva iz tekuće rezerve u ukupnom iznosu od 133.500 KM, za isplatu jednokratne pomoći u skladu sa Odlukom Vijeća ministara BiH⁸.

Sudu su također na raspolaganju bila i sredstva IPA 2019 po osnovu Grant sporazuma „Unapređenje rada na predmetima ratnih zločina u BiH“ između MFT-a BiH i Suda u iznosu od 687.632 KM.

Dakle, ukupno raspoloživi budžet za 2022. godinu je iznosio 20.024.132 KM, a realizovan je u iznosu od 18.220.924 KM.

Sud je izvršio prestrukturisanje rashoda budžeta u ukupnom iznosu od 81.000 KM, koje je odobrilo Ministarstvo finansija i trezora BiH.

⁷ Službeni glasnik BiH, broj 42/22

⁸ Odluka Vijeća ministara BiH o odobravanju sredstava tekuće rezerve za isplatu jednokratne novčane pomoći zaposlenim u institucijama Bosne i Hercegovine (Službeni glasnik BiH, broj 4/23)

8. FINANSIJSKI IZVJEŠTAJI

Sud je sačinio Godišnji finansijski izvještaj za 2022. godinu i dostavio ga nadležnim organima i institucijama u skladu sa važećim propisima i u utvrđenom roku. Analizom bilješki uz finansijske izvještaje konstatovano je da su iste sačinjene u skladu sa Pravilnikom o finansijskom izvještavanju.

8.1. Pregled rashoda i izdataka iz budžeta

U pregledu rashoda i izdataka po ekonomskim kategorijama-zbirno, u periodu od 1.1. do 31.12.2022. godine, ukupno ostvareni rashodi iskazani su u iznosu od 17.629.185 KM, što je za 1.707.315 KM manje u odnosu na rashode odobrene budžetom za 2022. godinu.

Vrijednosno značajni rashodi iz budžeta odnose se na: bruto plaće (12.745.608 KM), naknade zaposlenih (1.428.428 KM), izdatke za energiju i komunalne usluge (304.396 KM), ugovorene i druge posebne usluge (2.422.397 KM) i kapitalne izdatke (249.153 KM).

Novčane donacije realizovane su u iznosu od 591.739 KM, od čega se na plaće i naknade zaposlenih odnosi 513.061 KM, a na ugovorene usluge 78.678 KM.

Pregled rashoda i izdataka iz budžeta prikazan je u Tabeli I u prilogu Izvještaja.

U daljem tekstu navodimo nalaze revizije.

8.1.1. Bruto plaće

Bruto plaće i naknade plaća iz redovnog budžeta na 31.12.2022. godine iskazane su u iznosu od 12.745.608 KM, od čega neto plaće i naknade iznose 7.397.207 KM, a porezi i doprinosi 5.348.401 KM. Bruto plaće i naknade su za 337.195 KM veće u odnosu na prethodnu godinu. Bruto plaće i naknade plaća sa projekta IPA 2019 iskazane su u iznosu od 454.618 KM. Prosječan broj zaposlenih u 2022. godini u Sudu bio je 286.

U broj zaposlenih kojima je tokom godine obračunata i isplaćena plaća uključena je i jedan sudija koji je privremeno udaljen od vršenja dužnosti suca Suda BiH počev od 02.09.2022. godine pa do okončanja kaznene istrage, a na osnovu odluke Visokog sudskog vijeća – prvostepene disciplinske komisije. Navodimo činjenicu da, u skladu sa važećim odlukama navedeni sudija ostvaruje sva prava iz radnog odnosa, odnosno prima punu plaću dok je pod suspenzijom.

Obračun plaća za sudije i stručno osoblje (određene kategorije zaposlenih sa visokom stručnom spremom) vrši se na osnovu Zakona o plaćama i drugim naknadama u sudskim i tužilačkim institucijama na nivou BiH⁹, a za zaposlenike, revizora interne revizije i rukovodioca Jedinice za internu reviziju u skladu sa Zakonom o plaćama i naknadama u institucijama BiH. Tokom 2022. godine izvršena je korekcija na neto plaćama u skladu sa članom 6. Zakona o plaćama i drugim naknadama u sudskim i tužilačkim institucijama na nivou BiH.

⁹ Službeni glasnik BiH, broj 90/05, 32/07, 77/20

U iznosu bruto plaća i naknada iz plaća uključeni su i rashodi po osnovu naknade plaće za bolovanje preko 30 ili 42 dana koji iznose 31.725 KM (rashodi redovnog budžeta) i rashodi naknade plaće za vrijeme bolovanja do 30 dana koji ukupno iznose 543.939 KM (rashodi redovnog budžeta su 533.289 KM, a rashodi iz sredstava IPA su 10.650 KM).

Sud primjenjuje isti način obračuna naknada za vrijeme privremene spriječenosti za rad (bolovanje) kako za zaposlene kojima se plaće obračunavaju po Zakonu o plaćama i naknadama u institucijama BiH tako i za zaposlene kojima se plaće obračunavaju shodno Zakonu o plaćama i drugim naknadama u sudskim i tužilačkim institucijama na nivou BiH, uz obrazloženje da za obračun ovih naknada primjenjuje Instrukciju Ministarstva finansija i trezora BiH¹⁰.

Konkretno, svim zaposlenim se za prvih 30 dana bolovanja isplaćuje puni iznos plaće, a preko 30 dana isplaćuje se 70% plaće zaposlenim sa prebivalištem u RS, a 80 % plaće zaposlenim sa prebivalištem u FBiH.

Ministarstvo finansija i trezora BiH je dalo navedenu instrukciju za obračun naknade za vrijeme privremene spriječenosti za rad (bolovanje) zaposlenim u institucijama BiH pozivajući se na odredbe Zakona o plaćama i naknadama u institucijama BiH i Odluku o načinu i postupku ostvarivanja prava na naknadu za bolovanje u institucijama BiH, pa se shodno tome ova instrukcija može primijeniti samo na zaposlene u institucijama BiH kojima se plaće obračunavaju prema Zakonu o plaćama i naknadama u institucijama BiH.

Članom 12. Zakona o plaćama i naknadama u sudskim i tužilačkim institucijama na nivou Bosne i Hercegovine propisano je da sudije i tužioci imaju pravo na zdravstveno osiguranje i bolovanje u skladu sa važećim Zakonom o zdravstvenom osiguranju u RS ili u FBiH, zavisno od stalne adrese prebivališta sudije ili tužioca. Također je članom 18. Zakona o plaćama i naknadama u sudskim i tužilačkim institucijama na nivou Bosne i Hercegovine propisano da se član 12. primjenjuje na sve kategorije osoblja iz člana 17. ovog Zakona.

PREPORUKA 1

Obračun naknade za vrijeme privremene spriječenosti za rad (bolovanje) sudijama i određenim kategorijama stručnog osoblja u Sudu potrebno je vršiti u skladu sa Zakonom o plaćama i naknadama u sudskim i tužilačkim institucijama na nivou BiH.

8.2. Pregled prihoda i primitaka

Ukupno ostvareni prihodi i primici po ekonomskim kategorijama u periodu od 1.1. do 31.12.2022. godine, iskazani su u iznosu od 5.717.217 KM, što je za 1.514.207 KM više u odnosu na prihode i primitke planirane za 2022. godinu.

¹⁰ Instrukcija za obračun naknade za vrijeme privremene spriječenosti za rad (bolovanje) broj: 08/01-16-1-1856/13 od 10.05.2013. godine

Značajni prihodi odnose se na: prihode od novčanih kazni (4.839.691 KM), prihode od taksi (248.591 KM), prihode od izdatih uvjerenja (164.727 KM) i prihode od primljenih donacija (458.765 KM).

Sudske takse: Sa 31.12.2022. godine sudske takse su ostvarene u iznosu od 248.591 KM, od čega se iznos od 201.862 KM odnosi na uplate za potraživanja nastala u toku 2022. godine, dok se preostali iznos odnosi na potraživanja nastala u ranijim godinama¹¹.

Sud vodi pomoćnu evidenciju potraživanja po osnovu taksi i ista se redovno usaglašava sa uplatama knjiženim u glavnu knjigu te unosi u Sistem za automatsko upravljanje predmeta u sudovima (CMS). Neizmirena potraživanja se u zakonskom roku rješavaju urgentno putem telefona, upućivanjem opomena za plaćanje, a u slučaju da se ne izvrši uplata u ostavljenom roku, Sud za potraživanja od pravnih osoba ispostavlja izvršna rješenja prema poslovnoj banci te se temeljem takvih rješenja realizira prinudna naplata. Zakon o izmjeni i dopuni Zakona o sudskim taksama u postupku pred Sudom BiH¹² i za fizička lica propisuje prinudnu naplatu taksene obaveze te kada predmeti ispune uslov za izvršenje prinudne naplate, isti se prosljeđuju nadležnom sudu na izvršenje prema mjestu prebivališta.

U bilješkama uz finansijske izvještaje Sud je prikazao potraživanja po osnovu taksi za 2022. godinu u iznosu od 268.941 KM od čega je naplaćeno 201.862 KM, odnosno nenaplaćena potraživanja iznose 67.079 KM i ista se odnose samo na 2022. godinu. Nisu prikazana potraživanja po osnovu sudske takse iz ranijih godina. U toku revizije prezentirani su nam podaci o nenaplaćenim potraživanjima po osnovu sudske takse za ranije godine¹³ pri čemu ista za 2021. godinu iznose 66.134 KM, za 2020. godinu 96.265 KM i za 2019. godinu 194.688 KM.

Prihodi od novčanih kazni: Ukupno ostvareni prihodi od novčanih kazni sa 31.12.2022. godine iznose 4.839.691 KM od čega se 629.099 KM odnosi na potraživanja iz 2022. godine, a preostali iznos odnosi na uplate potraživanja po osnovu novčanih kazni iz prethodnih godina.

Sud kao sankciju počiniocima krivičnih djela može izreći novčanu kaznu, oduzeti imovinsku korist stečenu izvršenjem krivičnog djela te optuženog obavezati na plaćanje troškova krivičnog postupka. Visina novčane obaveze i rok za izvršenje iste određuju se u izreci presude. Novčana kazna izrečena osuđenom fizičkom licu se ne naplaćuje prinudno, već se ista u slučaju izostanka plaćanja zamjenjuje kaznom zatvora, dok se ostale sankcije naplaćuju prinudnim putem.

Zaključkom Kolegija Pravobranilaštva BiH, od 09.04.2013. godine prekinuta je višegodišnja praksa između Suda i Pravobranilaštva BiH u postupcima izvršenja prinudne naplate navedenih potraživanja, a Pravobranilaštvo BiH je počelo vraćati sve prijedloge za izvršenje mjera Suda. Kako sastanci sa Pravobranilaštvom nisu rezultirali adekvatnim rješenjem, odlučeno je da privremeno, do pronalazjenja konačnog rješenja, Krivično odjeljenje Suda BiH podnosi prijedloge za izvršenje i to direktno sudiji na Izvršnom referatu u okviru Upravnog odjeljenja Suda BiH.

Kada je riječ o efikasnosti naplate dosuđenih troškova krivičnog postupka, novčanih kazni i oduzimanja imovinske koristi pribavljene krivičnim dijelom konstatovano je da se preduzimaju

¹¹ Podaci iz zabilješki uz godišnji izvještaj za 2022. godinu

¹² Službeni glasnik BiH, broj 77/20

¹³ Pomoćne evidencije za sudske takse koje se vode u Excelu

aktivnosti u cilju njihove naplate, međutim procenat naplate prinudnim putem nije visok iz razloga što Sud, prilikom provjere imovinskog stanja dužnika, u većini slučajeva utvrdi da dužnik nema imovine koja bi bila određena kao sredstvo i predmet izvršenja. Postupci traju dugo i često završavaju bez uspjeha, a rok za zastarijevanje potraživanja koja su utvrđena pravosnažnom sudskom odlukom je deset godina¹⁴. Otežavajuća okolnost je i to što, za razliku od entiteta, Bosne i Hercegovina nema Agenciju za upravljanje oduzetom imovinom.

Ukupna potraživanja po osnovu novčanih kazni u krivičnom postupku za period 2011. – 2022. godina iskazana u bilješkama uz finansijske izvještaje Suda¹⁵ iznose 42.395.236 KM, a u navedenom periodu je naplaćeno ukupno 9.895.290 KM. Kada je u pitanju 2022. godina, ukupna potraživanja po osnovu novčanih kazni u krivičnom postupku iznosila su 1.584.853 KM, a naplaćeno je ukupno 629.099 KM.

Sud je izradio aplikaciju za evidentiranje prihoda u cilju efikasnog praćenja potraživanja na osnovu pravosnažnih presuda, u koju se unose novi predmeti počev od 2020. godine. Stručni saradnici koji rade na predmetima, po pravosnažnosti presude, u aplikaciju unose podatke o predmetu i iznos potraživanja te se u saradnji Odjeljenjem za materijalno-finansijske poslove vrši praćenje i sravnjenje uplata. Zbog obimnosti predmeta iz ranijih godina sravnjenje podataka o potraživanjima iz ranijih godina se vrši u okviru interne evidencije prema utvrđenoj proceduri u formi pomoćnih tablica, odnosno isti nisu uneseni u spomenutu aplikaciju.

Tokom revizije provjerili smo na bazi uzorka potraživanja koja su iskazana u pomoćnim evidencijama i objavljena u bilješkama uz finansijske izvještaje te smo u pojedinim slučajevima uočili značajna odstupanja iskazanih iznosa u odnosu na iznose stvarnih potraživanja po osnovu izrečenih presuda. Prema korigovanim tabelama¹⁶ koje nam je Sud dostavio nakon revizije ukupna potraživanja po osnovu novčanih kazni u krivičnom postupku za period 2011. – 2022. godina iznose 36.471.386 KM, od čega je naplaćeno ukupno 10.541.487 KM. Evidentno je da postoji razlika u odnosu na iznose potraživanja iskazane u bilješkama uz finansijske izvještaje i da sa sigurnošću ne možemo potvrditi da su evidencije tačne i da su njima obuhvaćena sva potraživanja na osnovu pravosnažnih presuda.

PREPORUKA 2

Potrebno je izvršiti provjeru podataka unesenih u pomoćne evidencije potraživanja Suda te osigurati da iste budu tačne i usaglašene sa izrečenim presudama, postupcima koji se vode pred Sudom i evidentiranim uplatama u Glavnoj knjizi.

PREPORUKA 3

Sud treba sačiniti detaljnu informaciju/analizu vezanu za problematiku naplate potraživanja po okončanim/pravomoćnim sudskim sporovima te sa istom upoznati sve relevantne institucije BiH.

Potraživanja koja su evidentirana u pomoćnim evidencijama Suda još uvijek nisu evidentirana u Glavnoj knjizi Suda. Ured za reviziju je u prethodnoj godini dao preporuku da se u saradnji

¹⁴ Zakon o obligacionim odnosima, član 379.

¹⁵ Podaci iz zabilješki uz godišnji izvještaj za 2022. godinu

¹⁶ Pomoćne evidencije u Excelu dostavljene putem e-maila 11.5.2023. godine

sa Ministarstvom finansija i trezora BiH preuzmu aktivnosti na iznalaženju odgovarajućeg modela za knjigovodstveno evidentiranje potraživanja iz pomoćnih evidencija u Glavnu knjigu. Sud je 14.12. 2022. godine održao sastanak sa predstavnicima Ministarstva finansija i trezora BiH, a od Ministarstva je 16.12.2022. godine dobio odgovor da sudski sporovi i njihova vjerovatnoća naplate treba da budu predmet objave i detaljnih obrazloženja u tekstualnom dijelu godišnjeg izvještaja Suda te da isti ne predstavljaju potraživanja već potencijalne buduće budžetske prihode po osnovu kazni. Daljnje aktivnosti oko evidentiranja potraživanja u Glavnu knjigu, zbog nepostojanja tehničkih mogućnosti u okviru ISFU sistema za ispravno evidentiranje istih, Sud nije preduzimaao.

Po pitanju evidentiranja potraživanja u Glavnu knjigu dali smo preporuku u prethodnom periodu (preporuka br. 2 u Tabeli 1) te smo ocijenili da Sud preduzima aktivnosti koje su prethodno prezentirane što će biti predmetom daljeg praćenja do okončanja implementacije.

Pregled prihoda i primitaka prikazan je u Tabeli III u prilogu Izvještaja.

8.3. Bilans stanja

U bilansu stanja na 31.12.2022. godine iskazana su ukupna sredstva u iznosu od 679.201 KM. Ukupne obaveze sa izvorima sredstava iskazane su u iznosu od 2.807.238 KM.

Značajne stavke bilansa stanja odnose se na neotpisanu vrijednost stalnih sredstava (667.632 KM), obaveze prema dobavljačima (611.816 KM), obaveze prema zaposlenim (1.397.032 KM) koje su izmirene početkom 2023. godine i izvore sredstava (667.632 KM).

Bilans stanja prikazan je u Tabeli II u prilogu Izvještaja.

8.3.1. Popis sredstava i obaveza

Sud je izvršio popis stalnih sredstava, novčanih sredstava, potraživanja i obveza te sitnog inventara i materijala na 31.12.2022. godine. Popisom su obuhvaćena samo potraživanja koja su iskazana u Glavnoj knjizi, dok potraživanja po osnovu sudskih taksi, novčanih kazni, troškova krivičnog postupka i oduzimanja imovinske koristi pribavljene krivičnim djelom, koja nisu evidentirana u Glavnoj knjizi, nisu bila predmet popisa. Dakle izvršeni popis sredstava i obaveza nije bio sveobuhvatan.

PREPORUKA 4

Popisom blagajne, potraživanja i obaveza potrebno je obuhvatiti sva potraživanja Suda, kako bi se osiguralo tačno izvještavanje o iskazanim stanjima imovine i obaveza na kraju godine.

9. JAVNE NABAVKE

Sud je donio Plan javnih nabavki za 2022. godinu, kako je propisano Zakonom o javnim nabavkama¹⁷.

Prema prezentovanim podacima¹⁸, Sud je u 2022. godini proveo 16 postupaka javnih nabavki. Od navedenog broja Sud je proveo 5 otvorenih postupaka u vrijednosti od 294.111 KM i 11 konkurentskih postupaka u vrijednosti od 141.357 KM. Sud je putem direktnog sporazuma izvršio nabavke u vrijednosti od 43.097 KM.

Nakon prethodno provedenih postupaka, ukupna vrijednost zaključenih ugovora iznosila je 478.565 KM (265.613 KM iz tekućih izdataka i 212.951 KM iz kapitalnih izdataka).

Sud je u planu javnih nabavki i pojedinačnim odlukama o pokretanju javnih nabavki iskazivao cijene sa uračunatim porezom na dodatnu vrijednost, što nije u skladu sa odredbama Zakona o javnim nabavkama BiH. Zakonom o javnim nabavkama BiH¹⁹ definisano je da ugovorni organ zasniva računanje procijenjene vrijednosti ugovora o javnoj nabavci na ukupnom iznosu koji će platiti, bez poreza na dodatnu vrijednost.

Izuzev prethodno navedenog, na osnovu pregledanog uzorka javnih nabavki nismo utvrdili značajnije nepravilnosti ili nedostatke.

PREPORUKA 5

Sud je dužan procijenjenu vrijednost ugovora za procedure javnih nabavki iskazivati bez poreza na dodatnu vrijednost.

10. KOMENTARI NA NACRT IZVJEŠTAJA

Sud je u ostavljenom roku dostavio komentare na Nacrt izvještaja o obavljenoj finansijskoj reviziji za 2022. godinu. U komentarima je dat osvrt na nalaze revizora i to: bruto plaće-obračun naknade za vrijeme privremene spriječenosti za rad (bolovanje) i pregled prihoda i primitaka. Navedene komentare nismo mogli prihvatiti jer nisu data adekvatna obrazloženja, niti je priložena relevantna dokumentacija koja bi uticala na izmjene nalaza u Izvještaju. Detaljno objašnjenje komentara koji nisu prihvaćeni dato je u odgovoru na dostavljene komentare na Nacrt izvještaja o obavljenoj finansijskoj reviziji za 2022. godinu, koji je dostavljen rukovodstvu Suda uz konačan Izvještaj o obavljenoj finansijskoj reviziji za 2022. godinu.

¹⁷ Službeni glasnik BiH, broj 39/14 i 59/22

¹⁸ Podaci iz tabelarnih pregleda sačinjenih za potrebe revizije.

¹⁹ Član 15., stav 1., Zakona o javnim nabavkama.



Reviziju u Sudu za 2022. godinu obavili su: Enes Alić - viši revizor za finansijsku reviziju (vođa tima), Aida Selimović – samostalni revizor za finansijsku reviziju (član tima), Željko Ćavar – samostalni revizor za finansijsku reviziju (član tima) i Nevena Bučo – mlađi revizor (član tima).

Kontrolu kvalitete Izvještaja proveo je Odjel za razvoj, metodologiju i kontrolu kvalitete finansijske revizije. Odjelom je rukovodio Nedžad Hajtić, koji je u međuvremenu preuzeo dužnost zamjenika generalnog revizora Ureda za reviziju institucija BiH.

**Vođa tima za
finansijsku reviziju**

Enes Alić, v.r.

**Rukovodilac Odjela za
finansijsku reviziju**

Miro Galić, v.r.

Broj: 02-16-1-971/23

Prilozi

Tabela I - Pregled rashoda budžeta za 2022. godinu
Tabela II - Bilans stanja na 31.12.2022. godine
Tabela III - Pregled prihoda i primitaka za 2022.godinu
Izjava o odgovornostima rukovodstva

Pregled rashoda budžeta za 2022. godinu

Sud Bosne i Hercegovine

Tabela I.

Opis	Odobreni budžet	Usklađivanja budžeta	Ukupni budžet	Izvršenje budžeta	Procenat (5/4*100)
1	2	3	4 (2+3)	5	6
1. Tekući izdaci	18.943.000	133.500	19.076.500	17.380.032	91
Bruto plaće i naknade	13.779.000	0	13.779.000	12.745.608	93
Naknade troškova zaposlenih	1.450.000	133.500	1.583.500	1.428.428	90
Putni troškovi	21.000	0	21.000	10.819	52
Izdaci telefonskih i poštanskih usluga	250.000	20.000	270.000	253.562	94
Izdaci za energiju i komunalne usluge	260.000	60.000	320.000	304.396	95
Nabavka materijala	121.000	0	121.000	102.617	85
Izdaci za usl. prijevoza i goriva	10.000	0	10.000	5.143	51
Unajmljivanje imovine i opreme	0	0	0	0	
Izdaci za tekuće održavanje	136.000	0	136.000	104.588	77
Izdaci za osiguranje	6.000	0	6.000	2.474	41
Ugovorene i druge posebne usluge	2.910.000	-80.000	2.830.000	2.422.397	86
2. Kapitalni izdaci	260.000	0	260.000	249.153	96
Nabavka zemljišta	0	0	0	0	
Nabavka građevina	0	0	0	0	
Nabavka opreme	170.000	-1.000	169.000	159.566	94
Nabavka stalnih sredstava u obliku prava	20.000	1.000	21.000	20.006	95
Rekonstrukcija i investicijsko održavanje	70.000	0	70.000	69.581	99
3. Tekući grantovi	0	0	0	0	
	0	0	0	0	
	0	0	0	0	
4. Budžet-neposredna potrošnja(1+2+3)	19.203.000	133.500	19.336.500	17.629.185	91
5. Višegodišnja kapitalna ulaganja	0	0	0	0	
	0	0	0	0	
6. Novčane donacije		687.632	687.632	591.739	86
	0	0	0	0	
7. Programi posebne namjene	0	0	0	0	
	0	0	0	0	
8. Ukupno budžet (4+5+6+7)	19.203.000	821.132	20.024.132	18.220.924	91

Rukovodstvo je Pregled rashoda budžeta po ekonomskim kategorijama odobrilo 28.02.2023. godine.

Predsjednik Suda
Ranko Debevec

Bilans stanja na dan 31.12.2022. godine

Sud Bosne i Hercegovine

Tabela II.

Opis	31.12.2022.	31.12.2021.	Procenat (2/3*100)
1	2	3	4
1. Gotovina, kratko. potraživanja, razgraničenja i zalihe	11.569	4.405	263
Novčana sredstva	10.409	4.405	236
Kratkoročna potraživanja	1.160	0	
Kratkoročni plasmani	0	0	
Interni finansijski odnosi	0	0	
Zalihe	0	0	
Kratkoročna razgraničenja	0	0	
2. Stalna sredstva	667.632	705.433	95
Stalna sredstva	5.370.458	5.406.083	99
Ispravka vrijednosti	4.702.826	4.700.650	100
Neotpisana vrijednost stalnih sredstava	667.632	705.433	95
Dugoročni plasmani	0	0	
Dugoročna razgraničenja	0	0	
UKUPNO AKTIVA (1+2)	679.201	709.838	96

3. Kratkoročne obaveze i razgraničenja	2.139.606	1.566.270	137
Kratkoročne tekuće obaveze	611.816	404.443	151
Kratkoročni krediti i zajmovi	0	0	
Obaveze prema zaposlenima	1.397.032	1.160.827	120
Interni finansijski odnosi	0	0	
Kratkoročna razgraničenja	130.758	1.000	13.076
4. Dugoročne obaveze i razgraničenja	0	0	
Dugoročni krediti i zajmovi	0	0	
Ostale dugoročne obaveze	0	0	
Dugoročna razgraničenja	0	0	
5. Izvori sredstava	667.632	705.433	95
Izvori sredstava	667.632	705.433	95
Ostali izvori sredstava	0	0	
Neraspoređeni višak prihoda/rashoda	0	0	

UKUPNO PASIVA (3+4+5)	2.807.238	2.271.703	124
------------------------------	------------------	------------------	------------

Napomena: Pravilnikom o finansijskom izvještavanju institucija Bosne i Hercegovine, čl.10. stav 4., napomenuto je da bilans stanja budžetskih korisnika **neće biti uravnotežen** (aktiva jednaka pasivi) zbog programski uspostavljenog sistema Glavne knjige, dok će bilans stanja koji radi Ministarstvo finansija i trezora na nivou Budžeta institucija Bosne i Hercegovine za tekuću godinu biti uravnotežen.

Rukovodstvo je Bilans stanja odobrilo 28.02.2023. godine

Predsjednik Suda
Ranko Debevec

Pregled prihoda i primitaka u 2022. godini

Sud Bosne i Hercegovine

Tabela III.

Opis	Planirani iznos	Izmjene i dopune	Ukupni planirani iznos	Ostvareni iznos	Postotak (5/4*100)
1	2	3	4 (2+3)	5	6
1. Neporezni prihodi	4.203.000	0	4.203.000	5.258.452	125
Prihodi od poduzetničkih aktivnosti i imovine i prihodi od pozitivnih kursnih razlika	0	0	0	0	
Naknade i takse i prihodi od pružanja javnih usluga	653.000	0	653.000	418.761	64
Novčane kazne (neporezne prirode)	3.550.000	0	3.550.000	4.839.691	136
2. Tekući transferi i donacije	0	0	0	458.765	
Primljeni tekući transferi od inostranih vlada i međunarodnih organizacija - donacije iz inostranstva	0	0	0	458.765	
Primljeni tekući transferi od ostalih nivoa vlasti	0	0	0	0	
Domaće donacije	0	0	0	0	
3. Kapitalni primici	0	0	0	0	
Kapitalni primici od prodaje stalnih sredstava	0	0	0	0	
Primici od finansijske imovine	0	0	0	0	
Primici od dugoročnog zaduživanja	0	0	0	0	
Primici od kratkoročnog zaduživanja	0	0	0	0	
4. Ukupni prihodi i primici (1+2+3)	4.203.000	0	4.203.000	5.717.217	136

Rukovodstvo je Pregled prihoda i primitaka po ekonomskim kategorijama odobrilo 28.02.2023. godine

Predsjednik Suda
Ranko Debevec

Izjava o odgovornostima rukovodstva

Međunarodni standard vrhovnih revizionih institucija (ISSAI 2580) predviđa da revizor treba da dobije odgovarajuću izjavu od rukovodstva institucije kao dokaz da rukovodstvo priznaje svoju odgovornost za objektivno prikazivanje finansijskih izvještaja saglasno mjerodavnom okviru finansijskog izvještavanja, te da je odobrilo finansijske izvještaje.

Rukovodstvo Suda Bosne i Hercegovine (u daljem tekstu: Sud) dužno je da osigura da finansijski izvještaji za 2022. godinu budu izrađeni u skladu sa Zakonom o finansiranju institucija Bosne i Hercegovine (Službeni glasnik BiH, broj 61/04, 49/09, 42/12, 87/12, 32/13 i 38/22), Pravilnikom o finansijskom izvještavanju institucija Bosne i Hercegovine (Službeni glasnik BiH, broj 25/15 i 91/17) i Pravilnikom o računovodstvu sa računovodstvenim politikama i procedurama za korisnike budžeta institucija Bosne i Hercegovine (protokol Ministarstva finansija i trezora Bosne i Hercegovine, broj 01-08-02-1-1515-1/15 od 4.2.2015. godine). Rukovodstvo je također obavezno da postupa u skladu sa Zakonom o budžetu institucija Bosne i Hercegovine i međunarodnih obaveza Bosne i Hercegovine za 2022. godinu (Službeni glasnik BiH, broj 42/22) i pratećim uputstvima, objašnjenjima i smjernicama koje donosi Ministarstvo finansija i trezora Bosne i Hercegovine, kao i ostalim zakonima u Bosni i Hercegovini, tako da finansijski izvještaji daju fer i istinit prikaz finansijskog stanja Suda.

Pri sastavljanju takvih finansijskih izvještaja odgovornosti rukovodstva obuhvataju garancije:

- da je osmišljen i da se primjenjuje i održava sistem internih kontrola koji je relevantan za pripremu i fer prezentaciju finansijskih izvještaja i usklađenost sa zakonima i drugim propisima;
- da finansijski izvještaji ne sadrže materijalno značajne pogrešne iskaze;
- da finansijski izvještaji sadrže sve relevantne podatke i analize izvršenja budžeta, kao i podatke o sistemu internih kontrola i realizaciji preporuka revizije;
- da se u poslovanju primjenjuju važeći zakonski i drugi relevantni propisi.

Rukovodstvo je također odgovorno za čuvanje imovine i resursa od gubitaka, pa stoga i za preduzimanje odgovarajućih mjera da bi se spriječile i otkrile pronevjere i ostale nezakonitosti.

Datum, 03.03.2023. godine

Predsjednik Suda

Ranko Debevec